

# Perutusan Pengerusi



Saya dengan berbesar hati membentangkan *Laporan Tahunan Lembaga Pemantauan Audit* bagi tahun berakhir 31 Disember 2018.

Sebagai sebahagian daripada mandatnya untuk membantu SC menggalakkan keyakinan terhadap kualiti dan kebolehpercayaan penyata kewangan yang telah diaudit. AOB terus mengukuhkan jangkaan kawal selia melalui tiga fungsi utamanya – pendaftaran dan pengiktirafan, pemeriksaan serta penguatkuasaan.

Susulan analisis ke atas pemerhatian kerja-kerja pemeriksaan pada tahun-tahun sebelum ini, AOB telah memulakan kajian mendalam ke atas kriteria pendaftaran yang sedia ada. AOB berpendapat bahawa telah tiba masanya langkah-langkah yang lebih besar diperkenalkan untuk menetapkan semula

kualiti asas untuk kebaikan pasaran modal Malaysia susulan perkembangan dalam beberapa tahun kebelakangan ini. Kriteria Baharu Pendaftaran dengan AOB diperkenalkan selepas perundingan bersama badan perakaunan profesional tempatan.

Berhubung dengan usaha penguatkuasaannya, AOB mengambil tindakan penguatkuasaan terhadap 11 juruaudit individu dan tiga firma audit kerana kegagalan mereka untuk mematuhi undang-undang, peraturan dan piawaian audit. AOB menyedari bahawa kriteria pendaftaran dan pemeriksaan ada hadnya dalam memastikan juruaudit mematuhi keperluan yang sedia ada. AOB berpandangan bahawa fungsi Penguatkuasaannya adalah aspek utama dalam peranannya dalam mengawal selia kerja juruaudit. Tindakan penguatkuasaan yang diambil memperkuuhkan komitmen AOB dalam mendukung integriti profesion audit.

## Mengekalkan Standard dan Penambahbaikan Selanjutnya

Pengiktirafan yang diterima daripada Persatuan Tadbir Urus Korporat Asia (ACGA) dalam laporan *Corporate Governance Watch 2018* (CG Watch 2018) merupakan satu pengiktirafan terhadap usaha-usaha terkini AOB. Laporan CG Watch 2018 tersebut mengiktiraf AOB sebagai “salah satu pengawal selia audit yang paling berkesan di rantau ini dan sebagai komunikator terbaik”.

Bagi AOB, pengiktirafan global ini adalah suatu galakan untuk meneruskan usahanya dalam mengekalkan standardnya sebagai pengawal selia audit dan meningkatkan lagi kualiti audit.

## Menangani Jurang Jangkaan Audit

Pengauditan kekal memainkan peranan kritikal dalam persekitaran perniagaan dan pasaran modal, dengan memberikan jaminan tentang kebolehpercayaan maklumat kewangan apabila membuat keputusan pelaburan. Walau bagaimanapun, kajian dan pemerhatian baru-baru ini menunjukkan bahawa juruaudit semakin tertekan, di peringkat tempatan dan luar negara, untuk mengesan penipuan dan mencegah kegagalan syarikat. Ini merupakan petunjuk yang jelas bahawa jurang antara peranan seorang juruaudit dan jangkaan pasaran bukan sahaja masih berterusan tetapi semakin meningkat pada tahun-tahun kebelakangan ini.

Audit merupakan satu komponen utama untuk memastikan kebolehpercayaan terhadap penyata kewangan teraudit. Oleh itu, tepat pada masanya bagi para pelabur, pengurusan, pengarah dan pihak berkepentingan untuk meningkatkan kefahaman mereka terhadap skop dan remit audit dan peranan masing-masing dalam ekosistem pelaporan kewangan.

Sehubungan itu, *Laporan Pemeriksaan Tahunan AOB 2017* yang pertama diagihkan kepada semua Syarikat Awam Tersenarai (PLC) untuk memudah cara dan meningkatkan pembabitan pengarah dan Jawatankuasa Audit dengan juruaudit mereka. AOB akan terus melaksanakan usaha ini sebagai amalan tahunan dan menggalakkan lembaga pengarah dan jawatankuasa auditnya untuk memahami dan membincangkan pemerhatian serta trend yang dikongsi dalam *Laporan Pemeriksaan Tahunan* dengan juruaudit masing-masing. Ini untuk memastikan bidang-bidang berisiko yang

khusus kepada entiti-entiti mereka ditangani dengan sewajarnya. Akhirnya, semua komponen utama dalam ekosistem pelaporan kewangan perlu memainkan peranan masing-masing dalam meningkatkan kualiti dan kebolehpercayaan penyata kewangan teraudit entiti kepentingan awam (PIE) dan kumpulan wang jadual di Malaysia.

## Penghargaan

Bagi pihak Lembaga AOB, saya ingin mengambil kesempatan ini untuk mengucapkan terima kasih kepada Marzunisham Omar, Penolong Gabenor Bank Negara Malaysia (BNM) atas sumbangannya kepada Lembaga AOB. Saya juga mengalu-alukan Hew Ee-Lu, Pengarah, Penyeliaan Insurans dan Takaful BNM sebagai ahli Lembaga AOB.

Saya ingin menyampaikan setinggi-tinggi penghargaan kepada ahli Lembaga AOB atas komitmen mereka dan saya berterima kasih kepada pengawal selia, badan profesional perakaunan dan pihak berkepentingan lain atas sokongan dan sumbangan berterusan mereka.

Kepada pasukan pengurusan dan warga kerja kami, terima kasih di atas dedikasi dan usaha luar biasa anda semua. Saya berharap untuk melaporkan kemajuan berterusan yang dicapai oleh AOB bagi tahun-tahun mendatang.



**Dato' Gumuri Hussain**